



阿舅个老屋

阿舅退休了，想愛同莊下老屋重新整理，做一個休閒度假个所在。該間老屋歸十年無人戴咧，歸個禾埕草弄弄、塞哼哼，硬硬得老虎核咧！牆頭壁角遞藤遞去淦淦，看毋出原本磚牆个色目，窗門鎖生鹵生去硬硬打毋開，灶下个樹門因致溼氣重，歿撇一角，歪歪孬孬勉強掛在門框項。入到屋家肚，蜘蛛牽絲牽去歸間，久無通風，歸間臭醜臭醜，地泥、桌面賁賁个壅塵，腳一躡落去，正經係「一步一腳跡」。

阿舅看著從細戴个老屋舊陋去變恁泥，真毋盼得，毋單淨無打卵退，還決心愛將老屋好好整理。逐擺阿舅來老屋掛草，舅姆會帶細瓦斯爐來煮點心、泡茶，同阿舅做伴。吾這兜外甥也長在分阿舅喊去搵這搵該，共下同禾埕个草伐淨淨、牆頭遞个藤也割割撇，屋脣惹惹杈杈个樹桎鋸撇、雜樹也斫斫撇。阿舅緊做緊有成就感，這鬍鬚麻加个老屋，親像多年無拷鬍剃頭个人，一禮拜較加个時間，斯分阿舅整理去光生光生咧！

阿舅真煞手，壞撇个窗門同鎖頭，用毋得家具、桌凳也請人來換換撇，屋頂个屋瓦也做下巡過，屋肚重新油漆、裝潢。阿舅親身監工，微毛末節都當注意，兩禮拜過，歸間屋都像換過新衫个樣，連灶下个盆頭鉢爌也一抹煞做下換新个，舅姆當滿意，該日當晝斯先煮一桌手路菜來塞吾這兜豺鬼个嘴空，一來試厥个傢啦伙好用無，二來答謝這站時間搵手，算係做完工，正經係一槌兩碰，實在還曉算哪！

阿舅自家設計厥个「新屋」，用裝潢隔間做出一間泡茶間、一間書房，兩間人客間，講使得分吾等這兜寮日去戴。但過在屋脣作一窟魚塘，種一頭柳樹、幾色蓮花、畜幾尾魚，牆頭脣本來該頭比人較高个桂花樹當在開花，牆頭下過新種兜粉紅色、白色个蔥蘭、柑黃色个菊花同映山紅，但還在屋簷下做一個花臺，專門分舅姆擺佢盡好个多肉植物，歸個庭園看來恬靜、文雅，行俚還鼻得著淡雅个茶香同細細个音樂聲，同一個月進前無人知理个老屋，正經係天差地別。

本來講係用來度假个老屋，阿舅同舅姆嘎當輒戴在該位，罕得轉都市屋家戴咧。厥等當合意在莊下輕鬆自在个生活，打早先去跋山運動，食飽朝歇暍下，有時阿舅會寫寫大字、有時斯整理厥个細花園，舅姆會同鄰舍共下去買菜，下晝頭兩儕會泡茶、行棋、看書，臨暗還會共下去散步。阿舅講，後生時無閒打拚、勞勞碌碌，這下有好同舅姆做伴，恬靜過日真好。下把下吾等寮日也會去尋厥等寮、在老屋戴兩日，正經感受著阿舅講个莊下生活單純个幸福呢！

作者：徐姿華

☆詞彙學習☆

【塞哼哼】sed[˥] bog[˥] bog[˥]：雜草叢生。

【臭醜臭醜】chiu[˥] bu[˥] chiu[˥] bu[˥]：形容悶溼的

【鬍鬚麻加】fu[˥] si[˥] ma[˥] ga[˥]：滿臉鬍鬚、不修邊幅。

霉臭味。

【拷鬍】kau[˥] si[˥]：刮鬍子。

【一槌兩碰】rhid[˥] chui[˥] liong[˥] pong[˥]：一舉兩得。

【一抹煞】rhid[˥] mad[˥] sad[˥]：全部

【映山紅】rhang[˥] san[˥] fung[˥]：杜鵑花。